

**Date – 18/03/2024**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

- 1. Mizorama Lok Sabha inthlan turah polling station 21 te chu venhimna uluk ngai zual (critical polling station) a puan a ni.**
- 2. Mi 1-in a thihpui leh mi 67 zet enkawl ngaia an awm phahna Khumtunga bekangum eisual chu vawiin hian College of Veterinary Sciences, Selesih ah endik a ni ang.**
- 3. Election Commission chuan Arunachal Pradesh leh Sikkim Assembly inthlan vote chhiar hun tur June ni 2-ah a sawn.**
- 4. Afghanistan-a lirthei chesualah mi 21 an thi a, midang 38 an hliam.**

<><><>

**POLL-PS**

**Election Commission of India hun ruat anga April ni 19-a Mizoram Lok Sabha bial inthlanna a vote thlak turah polling station 21 te chu venhimna uluk ngai zual (critical polling station) a puan a ni.**

**Mizoram Election department hotute hnen atanga thudawn danin Koladib district a Kolasib assembly bial chhunga polling station pakhat leh Serlui biala polling station 6, a bikin Assam nena inrina hnaiha awmte chu ven uluk zual ngai-ah puan a ni a. Aizawl district-a Tuivawl assembly bial huamchhunga polling station 3-te bakah Saitual district a Manipur dep Chalfilh biala polling station 3 leh Lengteng biala polling station 2 te chu ven uluk ngai zuala puan an ni bawk a. Myanmar ramri dep, Champhai district a Champhai South leh East Tuipui bial a polling station 2 ve ve te chu venhim uluk zual ngai a ni bawk. Hei bakah hian Lawngtlai district a Tuichawng biala polling station 2, Rengkashya leh Lukkisury te chu venhim uluk zual ngai a puan a ni a. Hei hi a chhan chu nikum a Chakma Autonomous District Council inthlan campaign lai a mi 4-in BJP candidate Amit Kumar Chakma an thah vang a ni.**

**Mizoram Lok Sabha bial inthlanpui lo awm turah hian polling station 9 chu ke a kal ngai leh lirthei luh theih lohna a ni hlawm a. Hetiang polling station hi Mamit district a Hachhek assembly bialah 3, Dampa bialah 1 leh Mamit bialah 2 a awm a. Lunglei district-a Lunglei South leh Thorang bialah**

Polling station 1 ve ve awmin Lawngtlai district a Lawngtlai West bialah pakhat a awm bawk a ni.

Lawng hmang lova tlawh pawh theih hauh loh polling station 14 a awm bawk a. He'ngte hi Mamit district a Mamit assembly bialah 2, Lunglei district a Thorang bialah polling station 4 leh West Tuipui bialah 6 te a ni a. Lawngtlai district a Tuichawng leh Lawngtlai West assembly bialah 1 ve ve a awm bawk a ni.



#### **KHUMTUNG FOOD POISONING**

Mizoram Health and Family Welfare hnuaiia Food and Drugs Administration Joint Director Pu Lalsawma'n Khumtung khuaa bekang um eisual ni a hriat avanga vanduaia a hmun ngei a chian turin nimin khan Khumtungah a kal.

Pu Lalsawma'n Akashvani Aizawl a hrilh danin bekang um eisual ni a hriat avanga mi 67 zet enkawl ngai a an awm lai a, bekang um ei ve lo ni a ngaih naute, kum 1 leh thla 9 mi thihna chuan a thawng hle a. He thil hi ngaih thutak a ngai hle ni a hria-in Khumtung khua ngeia kal ta a nih thu a sawi. An eisual bekang ei bangte hi Health department hnathawkte'n March ni 11 khan Khumtung atanga la-in endik tura ruahman a ni a, mahse, harsatna eng engemaw vangin an la endik thei lova. Vawiin hian College of Veterinary Sciences, Selesih-ah endik theih beisei a ni. Serchhip a kan Corr C. Lalhminghlua sawi danin nunna chan hi kum 1 leh Thla 9 mi Lalhlansangi, Pu Ramsangmawia fanu a ni a. a thin a lo khawih pawh hman a, Zirtawpni zan dar 11:45 khan Aizawl civil hospital ah a thi a. Khumtung phurh chhoh a nih hnuah lumen a ni a, Inrinni chawhnu dar 1:00 khan vui a ni.

Naute kum 2 pawh la tling lo hian bekang um a ei a rinawm chiah loh thu sawi a ni a. An chhungkua hi bekang ei hnu a an dam loh avangin bekang eisual a nu hnute a hnek vanga hetiang a awm ta hi ni a rin a ni.

Tun thla ni 9 Inrinni khan Serchhip District a Khumtung khuaah hian Bekang um ei sual in mi 67 dam lovin harsatna an tawk a. Heng dam lo zinga 45 chu Khumtung health sub centre aṭangin Damdawi in hrang hrang, State Referral Hospital, Falkawn, Aizawl Civil Hospital leh Trinity Hospital Silaimualah te enkawl tura thawn an ni a. Enkawlna tha zawk dawng tura thawn zawng zawng hi 45 niin an zinga 22 damin an chhuak tawh a, mi 22 Damdawi in hrang hrangah an la awm.

State Referral Hospital a awm Pi Lalremruati kum 42, Pu Lalthanzauva nupui chu a dinhmun ṭha lo in a la harh chhuak thei lova. State Referral Hospital a awm bawk Alfred Lalbiakluanga kum 12 Pu R.Lalramzauva fapa pawh zai hmabakin a la awm mek bawk.

Baktawnga Bekang umtute hi UPC Mizoram nu ho LAD te niin, Vanduaina tawka boral Laltdansangi pawh hi he kohhran chungkua a mi tho hi a ni.

<><><>

#### HOMICIDE

Tuikual South a cheng, Aizawl News Market a a dawr kudam chhunga nimin chawhma lama thi a hmuh Pi V. Lalhmingthangi thattu ni ngei a rinhlelh Irene Lallawmzuali (34) Ramthar North a cheng mek chu Zemabawk Dinthar veng a a thiannu in atangin nimin vek khan man a ni.

Home Minister Pu K. Sapdanga'n nimin chawhnu a chanchinbumite a hrilh danin Pi V. Lalhmingthangi tualthih thu report dawn a nih veleh hian Police leh Forensic team-te chu ruang awmna dawrah kal ngalin,ngawrh takin hnu chhui nghal a ni a. A hmun a thil awmdan leh he thil thleng chungchanga thu hriat nei awm angte sawi dan atangin Police team hrang hrang insem darh chuan a titu ni ngei a rinhlelh Irene Lallawmzuali chu man a ni ta a. Tualthattu ni a rinhlelh an man kut atang hian tualthahna atan a hriamhrei hman ni ngei a lang, chemte leh tualthi ta thil neih ni ngei a lang engemaw zat man tel a ni bawk. An mi rinhlelh in Police hma a a thusawi atang chuan ama tih ngei ni in a lang tih Minister chuan a sawi bawk a ni.

Nimin chawhma dar 10 vel khan Pi V. Lalhmingthangi (52) Tuikual South 'B' muala cheng chu Aizawl New Market-a ZV Market building a a dawr chhungah thi a hmuh a ni a. Police hotute hnen atanga Akashvani Aizawl thudawn danin Pi V. Lalhmingthangi thattu hian a dawr rawk a tum avanga in nangchinga that ta mai tih leh inhre sa an ni tih hriat a la ni lova. Dawr nghah rei chang a neih avangin a pasal hian mutsan mai chang a nei niin an sawi a. Tukinah ina a awm loh avang leh a mobile phone a an biak dawn pawha a lak theih loh avangin an chunghte chu a dawrah hian an va kal a. Pawn lamah a lo inkalhin dawr kawngkhar bul vela thisen an hmuh avangin a kalhna chhu chhia-in an lut ta a. Thisen tam tak baw nuai karah thi a hmuh a ni ta a ni.

Police te'n an chhui zui a. Pi V. Lalhmingthangi ruang hi Aizawl Civil Hospital-ah nimin vek khan post-mortem a ni.

<><><>

#### QUANTUM OF PUNISHMENT

Aizawl a Special Court (Prevention of Corruption)-in Zirtawpni a eiruk thubuai a thiam loh a chantir tak Chakma Autonomous District Council (CADC)-a CEM hlui thi tawh Buddha Lila Chakma nupui Sujata Chakma hremna chu wawiinah puan a ni ang.

Special Judge Dr. HTC Lalrinchhana chuan Zirtawpni khan Sujata Chakma hi IPC section 409/420 leh 120 B bakah Prevention of Corruption Act, 1988 section 13 (2) r/w 13 (1)(c) leh (d) leh IPC section 120B hmangin thiam loh a chantir a. Judicial custody-a dah tura thupek siamin wawiin hian a hremna chungchang ngaihtuahna-ah court-ah hruai leh a ni ang. He thubuai a

mawhpurtu a puh Buddha Lila Chakma erawh chu a thubuai ngaihtuah lain nikum October ni 10 khan a thih avangin court thutlukna-ah a lang ve ta lo a ni.

He thubuai lo intan dan chu - Kum 2012 khan Finance Commission 13-na chuan CADC Session Hall sakna a tan cheng nuai 300 a ruahman a, he cheng nuai 300 ruahman ah hian cheng nuai 232 hi Mizoram sawrkar in CADC kutah a pe a ni. CADC chuan Pu R. Vanlalhluna, Edenthlar Veng, Aizawl chu cheng nuai 250, sing 6, sang 3 leh 138 hmanga he hna hi thawk turin March ni 14, 2013 khan inremna an siampui a, he hna hi March ni 14, 2015 a thawk zo tura inremna hi siam a ni. Contractor-in a thawhna sum thawh hnihna a dawn hma deuh in chutih hunlaia CADC a CEM lo ni ta Buddha Lila Chakma chuan he hna hi contractor Pu R. Vanlalhluna hnen atanga chhuh sakin a nupui Pi Sujata Chakma chu inremna 'Power of Attorney' (Deed of Agreement) hmangin a thawh chhonzawmtir a, court-a thuhretute thusawi atanga tarlan a nih dan chuan Pu Buddha Lila Chakma hian contractor hnenah hian harsatna hrang hrang siam lui in, dan anga a thawh tur ang bak pawh a thuneihna hmang sual in thawh luih tir a tum thin a, contractor Pu RV Hluna pawh hian Buddha Lila Chakma nupui Pi Sujata Chakma hnenah hna hi pe lo thei lo dinhmun ah a ding ta a ni.

He thubuai chhuitute'n court-a an sawi dan chuan he CADC Session Hall sak hna hi Sujata Chakma leh a pasal Pu Buddha Lila Chakma te hian an chawhlan chawp chilh mai a, chutihlain Pi Sujata Chakma hian pawisa hi tum hnih dawngin a vaiin cheng nuai 48 leh sing 6 zet a dawng thung. Sujatha Chakma te nupa pawisa eiruk hi a tlem berah cheng nuai 34, sing 6, sang 6 leh 585 ni a chhut a ni.

<><><>

**CIKKHP CONFERENCE CONCLUDED**

Isua Krista Kohhran Rampum Hmeichhe Inkhawmpui vawi 49-na, Dulte Kohhrana nghah chu nizan, Pathianni zan khan a tiak.

Thlenkim zan, Zirtawp zan inkhawm Upa C. Vanlalrawni, Chairman, Central Isua Krista Kohhran Hmeichhe Pawl ( CIKKHP) kaihhruai-ah General Secretary report bakah bialtin Secretary atangin report ngaihthlak a ni.

Inrinni chawhmaah Pathian biak inkhawm buatsaih a ni a. Hetah hian Evan. Malsawmdingliana, Home Mission Speaker chuan Pathian thuchah a sawi a. Chawhnu inkhawmah Evan. Lallianzuala, Home Mission Speaker-in thuchah a sawi a. Zan inkhawmah Upa H. Lalluaia, Adviser, CIKKHP chuan Pathian thuchah a sawi.

Pathianni chawhma inkhawm chu Pi R. Lalnunfeli, Secretary, Aizawl West Bial Hmeichhe Pawl chuan a kaihhruai a. Rev. Israel Lalramliana, W. Phaileng Bial Pastor chuan thuchah a sawi a. Member Boral sunna hun Rev. R. Lalfakzuala, Dulte Bial Pastor chuan a kaihhruai a. Pathianni chawhnu inkhawm chu Pi T. Lalmangaihi, Vice Chairman, Lengpui Bial chuan a

kaihruai a. Kohhran huanga chawimawina dawngte leh lawmman dawngtute hnenah chawimawina leh lawmman hlan a ni. He hunah hian Rev. MC. Vanlalbiaka, Mamit Bial Pastor hnen atangin Pathian thuchah ngaihthlak a ni.

Pathianni zan, inkhawmpui tiak zan chu Upa C. Vanlalrawni, Chairman, CIKKHP chuan a kaihruai a. Upa HC Thangchungnunga, Ariel Secretary, Central Hmeichhe Pawl in-charge hnen atangin Pathian thuchah ngaihthlak a ni.

Inkhawmpui chhung hian Zaipawl, Solo leh special item dangte ngaihthlak thin a ni a. Inkhawm banah lengkhawma Pathian fak hla sakho thin a ni bawk. Isua Krista Kohhran Rampum Hmeichhe Inkhawmpui palai kal zinga upa ber chu pi Lalnunmawii, Kawnpui, kum 91 a ni.

Isua Krista Kohhran Rampum Hmeichhe Inkhawmpui rorel zingah kum 2025 Rampum Hmeichhe Inkhawmpui Thupui atan “Puitlin lam i pan ang u” Heb. 6:1 chu thlan a ni. Kum 2025 Central Hmeichhe Pawl Golden Jubilee lawmna tur Programme duan sa pawm a ni a. Riangvai chanhai enkawlina tur hmun lei tura rawtna pawm a ni. Incheina chungchanga awareness buatsaih tura rawtna pawm a ni bawk. Kum 2024-2025 Central Hmeichhe Pawl Budget atan Rs. 8,82,000/- pawm a ni.

<><><>

**EC CHANGES COUNTING DATE OF ARUNACHAL PRADESH & SIKKIM ASSEMBLY POLLS TO JUNE 2**

Election Commission chuan Arunachal Pradesh leh Sikkim Assembly inthlan vote chhiar hun tura June ni 4 lo ruat tawh chu June ni 2-a chhiar zawk turin a sawn.

Election Commission thuchhuahin a sawi danin, Arunachal Pradesh leh Sikkim-a Parliament inthlan turah erawh chuan engmah tih danglam a awm lo thung a ni.

Puan tawh angin Election Commission chuan Inrinni khan Lok Sabha inthlan hun a puan rualin Sikkim, Odisha, Andhra Pradesh leh Arunachal Pradesh-a Assembly inthlan hun tur hi a puang nghal a.

Member 32 awmna Sikkim Assembly leh member 60 awmna Arunachal Pradesh Assembly-ah chuan Lok Sabha inthlan rualin April ni 19 khian tum khat-ah vote an thlak dawn a ni.

<><><>

**NTA TO CONDUCT CUET-UG FROM MAY 15-31**

National Testing Agency (NTA) chuan India ram chhung University-a zirlai lut turte tana an thiam enchhinna ‘Common University Entrance Test (CUET) – UG’ chu May ni 15 leh ni 31 inkarah a buatsaih dawn.

May ni 20 leh ni 25-ah hi chuan Inthlanpui vote thlak ni nen a innan dawn avangin Test ruahman a ni lo thung ang.

UGC Chairperson M Jagadesh Kumar chuan CUET ti tura dilna thehluk theih hun tawp March ni 26 hnu-ah zirlaite awmna azira an exam-na hmun ruat dan a hriat theih tur thu a sawi a. Exam ni tur tak hi NTA chuan inthlan

ni nena inbawhbuai lo turin May ni 15 leh ni 31 inkar khawi emaw ber a la puang chiang leh dawn a ni.

<><><>

**AFGHANISTAN HIGHWAY ACCIDENT: 21 DEAD, 38 INJURED**

Afghanistan Helmand Province-a Herat-Kandahar lamliana lirthei chesualah mi 21 an thi a, midang 38 an hliam.

Information and Culture Directorate of Helmand Province sawi danin lithei hi nimin khan Grishk district-a Yakhchal hmunah a chesual a. Tualchhung thuneitute sawi danin bus leh lirthei ke 2 nei chu an insu phawt a. Hetia an insut lai hian tuialhthei phur lirthei chuan a rawn su zui ve leh a, lirthei chu a pahnihin a kang zui ta a ni.

Lirthei chesuala thi zinga 16 chu bus-a chuang an ni a, 2 chu lirthei ke 2 neia chuang an ni a, a dang 3 chu tuialhthei phur lirtheia chuang an ni.

<><><>